

M549: Mainzer Friedgebot von 1300

- 0,1 in gotes namen . âmen . wir der schultheize . die rehtære . die râthêrren
und die burger gemeinliche von Meinze . setzen
- 0,2 unde machen an disem geinwürtigen brieve . gote von himelrîche . zuo
liebe unde zuo êren . unde zuo gemache . und zuo
- 0,3 vriden . leien . kristenen . unde juden . rîchen und armen . die zuo Meinze
wonent . die in dem vriden wollent . sîn .
- 0,4 allez daz hier nâch geschriben stêt veste unde stæte zuo haltene . von deme
tage als der brieve geschriben wart . biz ûfe
- 0,5 sante Martines tac . der nû allernæheste komen sal . von allerêrste sô setzen
wir unde machen daz dechein burger
- 0,6 von Meinze . sal eischen in die stat zuo Meinze dechein ûzman in der
stete laster oder schaden . oder iemannes der in Meinze
- 0,7 ist . swer ouch alsus in die stat geeischen wirdet . an deme mac nieman
den vriden brechen . und swanne die meister
- 0,8 daz bevreischent sô sulent sie in ane sprechen . und der burger der die
ûzliute in die stat hât geeischet . wirdet er beredet .
- 0,9 er sal ûze Meinze varen ein jâr zuo bezzerunge . in den ahte tagen als ime
die burgermeister gebietet . oder sal sich entslahen
- 0,10 mit sînem eide . ist iz ouch daz er niht sweret oder ûz vert in den ahte tagen
. sô sal er zwei jâr ûzer Meinze varen nâch
- 0,11 der meister gebote . und ist iz danne daz er ûze Meinze niht en vert . sô
sulen die burgermeister den rât manen in zuo helfene
- 0,12 und dâr nâch den burger ane grîfen . und in der stete sloz legen einen mânt
. mit der helfe die in deme râte sint . und
- 0,13 sal dâr nâch ûz varen alsô hier vore geschriben stêt . und ist daz er danne
niht ûz vert sô sal man in alsô lange . in daz
- 0,14 sloz legen . als der rât wile sô setzen wir unde machen daz nieman in Meinze
. trage offenliche oder heimeliche .
- 0,15 nahtes oder tages . dechein panzier . halsberc . stichmezzet . oder wane
stichmetzenscheiden . oder ander
- 0,16 arclîche wâfen oder wâpen . und gît man des iemanne schult . der sal sich
entslahen mit sînem eide . oder sal vier wochen
- 0,17 ûzer Meinze varn . ouch machen wir daz dechein man sal machen zuo
Meinze . offenliche oder heimeliche dechein
- 0,18 arclîche houfunge . oder samenunge . swem ouch die meister des schult
gebent . er und die anderen persônen solent sich
- 0,19 des entslahen mit irem eide . oder sulen ein halp jâr ûzer Meinze varn . ist
aber daz er und die persônen . niht swerent

- 0,20 und dâr nâch niht ûze Meinze varnt als iz die burgermeister in gebietent .
sô sal er oder die persônen . dâr nâch varen
- 0,21 ûzer Meinze ein jâr . ob ieman der geletzet ist oder beswæret . oder des
vriunde beswæret sîn oder geletzet . als in
- 0,22 die zwêne . meister oder ein meister vriden gebietent und der den vriden
niht gelobet mit drouwen . der sal ûze Meinze
- 0,23 varen ein jâr . und ist daz der selbe . oder ander die über der meister oder
des meisters gebot den vriden brechent
- 0,24 mit der tât . der oder die persônen sulen der bezzerunge zwâ . tuon ist daz
ieman zuo Meinze . ûz sîneme hûse . ûz sîneme
- 0,25 hove . oder ûz der gazzen dâ in die burgermeister vindent daz er mit sînen
vriunden löufet wider der meister gebot und
- 0,26 brichet den vriden . der sal ûze Meinze varn zwei jâr . und sîne mitevolgær
sulent der bezzerunge zwâ tuon .
- 0,27 swelich dâ zuosamene . swerent oder gelobent . in der stete laster oder
schaden . oder iemannes der in Meinze ist . gît man ime
- 0,28 des schult . er sal sich des entslahen mit sînem eide . oder sal ein jâr ûze
Meinze varn . daz nieman ûf dem râthûse oder
- 0,29 anderswâ . dâ die râthêrren zuosamene kument sal machen keinen
überbraht in deme râte . und swer dâr wider tuot . der
- 0,30 sal dâ liden unde bezzeren . als daz mêre teil des râtes heizet . und ist ieman
ûzwentic des râtes der die râthêrren
- 0,31 widerrüefet und daz sie machent der selbe und sîne mitevolgær . die sulen
ûz Meinze varn einen mânt . und dâr nâch bezzeren
- 0,32 als daz mêrteil des râtes spricht . daz unser burgermeister . und ander von
deme râte . die zuo tage rîtent . von der zît daz
- 0,33 dirre brieu gegeben wart biz ûfe sante Martines messe geleite geben ûzliuten
in die stat zuo Meinze . und sal man daz
- 0,34 künden den die dâ geleidiget sint . âne den die in des rîches âhte sint oder
die die stat geroubet oder gebrant hânt .
- 0,35 daz kein burger zuo Meinze mit wâpenen oder mit gewâfeneten liuten sal
dechein ûzmanne zuo helfe kumen oder helfe tuon .
- 0,36 iz en sî danne mit der meister heize und urloube . und sal ouch daz
geschehen âne der meister geværde . swer daz brichet der sal
- 0,37 ûz Meinze varn ein jâr . und sal dâr nâch bezzeren als ime daz mêre teil des
râtes gebiutet . wirdet er des beredet .
- 0,38 burger von Meinze . die ûf dem lande umbe ir selbes guot hânt zuo schaffene
. die mûgen wole mit wâpenen umbe ir selbes geschefnisse
- 0,39 rîten unde varn . als in vüegen mac âne geværde . und âne arge liste . swer
den anderen zuo Meinze . arclîche heimsuochet .
- 0,40 mit stôzene oder mit werfene . an sîn hûs dâ er inne wonet . oder daz sîne
dâ nimet âne gerehte . ist daz man es
- 0,41 ime schult gît . er sal sich entschuldigen mit sînem eide . oder sal ein
vierteil jâres ûze Meinze varn . ist aber daz man in der
- 0,42 heimsuochte bereden mac . mit zwein biderben mannen . er sal deme
bezzeren . dem die heimsuochte geschehen ist und ouch dem gerehte .
- 0,43 dâr nâch daz der vrevel ist . swelich burger zuo Meinze einen sînen burger
ûzwentic Meinze . an sîneme lîbe oder an sîneme

- 0,44 guote leidiget oder beswæret . wirdet er des beredet er sal bezzeren geliche
als er daz in der stat hæte getân . swelich burger zuo Meinze
- 0,45 den andern wundet zuo Meinze . mac man . in des bereden . mit zwein
biderben mannen . als man ime des schult gît . der sal ûz
- 0,46 Meinze varn ein vierteil jâres . und êr er wider in Meinze var . sô sal er .
geben dem den er gewunt hât zwei pfunt haller
- 0,47 ob er sie vordert . und der stat vûnv pfunt haller zuo bezzerunge . und sal
zuo Meinze niht wider in varen er en habe daz gelt
- 0,48 gegeben oder pfant die dâ bezzer sîn . und vert er über daz in die stat er sal
der bezzerunge . zwâ tuon . und ist daz er des
- 0,49 geltes niht en hât . sô sal er niemer in die stat kumen . swer den anderen
bluotrunstic machet rœufet oder slehet . swanne
- 0,50 man ime des schult gît . mac in bereden mit zwein biderben mannen .
unsen burgern . er sal varen ûz Meinze einen
- 0,51 mânt und sal geben ein halp pfunt dem der dâ geletzet ist . ob er daz vordert
. und der stat ein pfunt haller . und sal die
- 0,52 pfenninge geben êr . er wider in die stat kume . tuot er des niht sô sal er
der bezzerunge zwâ tuon . und ist daz er des geltes
- 0,53 niht en hât . sô sal er ûz Meinze varen ein vierteil jâres . swelich burger .
einen burger zuo Meinze mit vore gesetztem râte . einen
- 0,54 burger von Meinze tôt slehet mac man in bereden mit zwein biderben
mannen . unsen burgern . der sal ûz Meinze varn . vûnv
- 0,55 jâr . und sal niht wider in die stat kumen er en habe . von êrste gegeben
drîzic pfunt haller . vûnvzehen pfunt der stat und
- 0,56 vûnvzehen pfunt dem gerehte . und von allerêrste . des tôten vriunden
gebezzert . ist aber daz ein burger den andern
- 0,57 von geschichte . âne ûfgelaht tôt slehet . mac man in des bereden mit zwein
biderben mannen unsen burgern . er sal ûz Meinze
- 0,58 varen zwei jâr . und sal geben drîzic pfunt haller . halbe der stat . und halbe
deme gerehte . und des tôten vriunt vore
- 0,59 abe legen . êr . er wider in die stat kume ist daz kein burger zuo Meinze
einen anderen burger von Meinze . an einem
- 0,60 ougen oder an zwein blendet . mac man in des bereden mit zwein biderben
mannen . der sal ûz Meinze varen vûnv
- 0,61 jâr nâch der meister gebote . und sal geben drîzic pfunt . der stat vûnvzehen
pfunt . und dem gerehte vûnvzehen pfunt
- 0,62 êr er wider in die stat kume . und sal des geblanten vriunde . und in von
êrste abe legen êr er wider in die stat kume .
- 0,63 ist daz kein burger zuo Meinze . einen man der sich in Meinze genert unde
gewert . væhet oder verspehet oder hilfet vâhen
- 0,64 der burger . und sîne helfær burger zuo Meinze . die sulen ûz Meinze varn
unde niemer in Meinze kumen . swelich burger zuo Meinze .
- 0,65 oder ein ander man ûzer Meinze . decheine jungvrouwen . oder vrouwen .
in Meinze oder ûzwentic Meinze . væhet oder roubet der
- 0,66 sal ûzer Meinze varn und niemer wider in Meinze kumen er und sîne
mitevolgær . und alles des guotes daz die vrouwe oder die
- 0,67 juncvrouwe hât oder sie ane ersterben mac . des sal man in niht mê geben
wen ire nôtdurft . und den manne nihtesniht . und

- 0,68 ist daz die vrouwe oder die jungvrouwe . guot hât . oder sie an ersterben
mac . und bî dem manne stirbet . daz guot daz sie lâzent
0,69 daz sal . ûf ire næhesten erben und niht ûf den man . oder sîn erben vallen
oder sterben . ist aber daz die vrouwe oder die
0,70 jungvrouwe . nâch des mannes tôde . wider zuo Meinze vert . und ire guot
wider eischet . der sal man ire guot allez wider geben
0,71 und ist daz der selbe man . nâch sîneme tôde læzet dechein guot in Meinze
oder in der grâveschaf zuo Meinze . daz sal der
0,72 stat sîn . kein burger von Meinze sal sîne miteburgær ûzer Meinze laden
vüre den küninc . und swer daz brichet der
0,73 sal ûzer Meinze varen ein jâr . und sal ûze Meinze alsô lange sîn als daz
mêrteil des râtes spricht . swelich man
0,74 oder vrouwe burger zuo Meinze . wile klagen oder klaget ûf eines anderen
sînes burgers guot ûzwentic Meinze gelegen . umbe
0,75 schult . kumet er zuo den burgermeisteren . unde klaget in daz . sô sulen
die burgermeister hime gebieten der ûf daz guot klaget .
0,76 daz er vore in reht oder gûlte neme . tuot . danne ime ûf des guot geklaget
der gûlte oder reht in den vierzehen nahten
0,77 als ime die burgermeister geboten hânt . sô mac der ander ûf sîn guot klagen
. ûzwentic Meinze . oder an geistlichem
0,78 gerehte innewentic Meinze . swelich burger zuo Meinze sîne burgerschaf
ûf gît . und klaget ûf eines burgers guot .
0,79 von Meinze . daz der niemer sedelhaft in Meinze sal werden . swâ die stat
vêhede hât . und unsen burgern urloup
0,80 wirdet gegeben zuo pfendene . die pfant sal man antwürten den
burgermeistern . alsô lange biz wir uns verrehten mit den
0,81 ûfe die gepfant ist . swelich burger . zuo Meinze . die voregenanden
ûbeltætigen . die tôtslac . wunden . bluotrunste . rœufen
0,82 oder slahen hânt getân . inne des daz sie in bezzerunge . ûze solten sîn und
niht wâren ûz gevarn . oder die êr . der zît zuo
0,83 Meinze wider in varent . und niht ûz gevaren sint . als her nâch geschriben
ist . swer die er sî burger oder witewe . swer die
0,84 in sîner herberge heltet heimelîche oder offenbâr . ist daz man dem burger
. oder der witewen . schult gît dâr umbe . sie sulent sich
0,85 des entslahen mit irem eide . oder sulent ûze Meinze varn . und zwivaltige
bezzerunge lîden . nâch der missetât der selben vrevelær
0,86 ist aber daz die vrouwe oder die witewe niht swern wile . sie sal inne ligen
einen mânt . ist daz ieman den anderen arclîche
0,87 heimsuochet mit wâfenen oder âne wâfen . swie er sich weret gein sînem
vîende . in sîneme hûse . in sîneme hove oder in sînem
0,88 vrastmunte dâ er inne wonet dâr ane hât er niht der stete vriden gebrochen
. swelich man oder vrouwe burger zuo Meinze
0,89 vüre eines anderen burgers hûs in Meinze gêt und den . arclîche her ûz
eischet . der oder die sulen ûze Meinze varn ein
0,90 vierteil jâres . swelich burger . zuo Meinze ûzwentic Meinze vîende hât .
und mezzet eischet zuo tragene der sal sîne vêhede
0,91 den meisteren sagen . sô sulent sie sîne vêhede ervarn . ob sie die niht
wizzent . und dâr nâch sô sulen sie urloup geben

- 0,92 dem burger . und sînen kinden . und sînen knehten die sîn brôt ezzent
mezzet zuo tragene . und die sîne kleider tragent
0,93 und ander gewæpnisse an sîneme lîbe die wîl sîn vêhede wert . wær ouch
sache daz der burger . sîne kint und sîne
0,94 knehte . inne des ieman zuo Meinze leidigent oder letzen . der selbe oder
sîne knehte die sulent bezzern als dâ vore geschriben
0,95 ist . swelich jude ein anderen juden zuo Meinze wundet oder slehet . oder
einen kristenen der sal umbe daz slahen geben
0,96 vûnv pfunt . und umbe die wunden zehen pfunt . haller und sal zuo Meinze
inne belîben . und hât er des geltes niht . sô sal
0,97 er alsô lange ûze Meinze varn . biz er des beredet wirdet mit zwein biderben
mannen . eineme juden und eineme kristene . biz er daz
0,98 gelt gibet . wær ieman zuo Meinze . iz sî vrouwe oder man . der sich
unbescheidenliche ane leget . dâ von sîne vriunde mûgen
0,99 gesmitzet werden . und die vriunde den meistern daz kûndent und vûre
legent den mûgent die meister urloup geben daz
0,100 sie die kestigen . und halten alsô daz iz in an den lîp niht en gê . swelich
man zuo Meinze inne wonende ist der rûtinge
0,101 treget . oder swert . oder baseler der sal ûz Meinze varen ein vierteil jâres .
ist daz nahtes oder tages ieman lœufet
0,102 mit wâfenen zuo den viure . als er die glocken hoeret . und tuot daz zuo
helfe ime der dâ brinnet . ist daz man in dâr umbe ane sprichet
0,103 er sal sich es entslahen mit sînem eide . daz er die wâpen habe getragen âne
geværde . und dâr umbe ist er niht schuldic keine
0,104 pîne . sweliche . vrouwe zuo Meinze ein ander vrouwe slehet . stoezet .
rœufet . oder wundet . wirdet sie es beredet mit zwein
0,105 mannen oder vrouwen . die sal inne ligen einen mânt . und sal ein halp
pfunt haller geben der stat êr sie ûz gê . und hât sie
0,106 des geltes niht . sô sal sie zwêne mânde inne ligen . wær ieman zuo Meinze
. er sî vrouwe oder man . kristen oder jude
0,107 der dem andern drœuwet umbe sîn guot . ist daz der dem gedrœuwet wirdet
dem burgermeister . oder einem andern manne von deme râte
0,108 saget den drœuwær . die sulent nâch dem drœuwær senden daz er von ime
reht neme . und ist daz er des niht en tuot sô sal der
0,109 drœuwær nâch der meisters gebote ûz Meinze varn . ein vierteil jâres . unde
tuot er des niht . sô sal er der bezzerunge zwâ tuon .
0,110 wær aber sache daz der selbe drœuwær . als er wider in die stat quæme .
umbe sîn ûzvalt dem selben anderwerbe drœuwete . sô sal
0,111 er anderwerbe ûz varen ein jâr . und swaz schaden ime deme gedrœuwet
was dâr nâch von des drœuwærs wegen geschæhe .
0,112 des sal die stat warten ûf des drœuwærs lîp unde guot . ist daz kein lîhte
man . ein boese persône . und ein verlumundet
0,113 boesewiht . als iz die meister ervarent einen êrsamen man boesliche handelt
mit Worten oder mit werken . ist daz den boesewiht
0,114 rœufet oder slehet dâr umbe ist er niht schuldic decheine pêne . ist aber daz
der biderbe man . vertreget durch sîne biderbicheit
0,115 die boese wort oder werc . und daz dâr nâch bringet in den rât mit kuntschaf
. den boesewiht sal man sêre slahen

- 0,116 mit steben ûf des bischoves hove . und sal in ûze Meinze . trîben ein jâr .
und alsô lange als die stat wile .
- 0,117 ist daz ieman . iz sî nahtes oder tages . gewâpenet zuo eineme geschreie
oder zuo einem gestüber . dâr umbe ist er niht schuldic .
- 0,118 decheine pêne . oder bezzerunge . ist aber daz man in dâr umbe ane spricht
. er sal sich des entslahen mit sînem eide . daz er dare sî
- 0,119 komen durch der stete . êre . und durch daz bezziste . swelich burger zuo
Meinze einen man . swer er ist . letzet . heizet oder rætet leidigen
- 0,120 oder letzen an sîneme lîbe oder an sîneme guote . swanne man im des schult
gît er sal sich es entslahen mit sînem eide . daz er daz niht
- 0,121 gerâten . oder geheizen oder getân habe . tuot er des niht er sal bezzern als
ob er daz mit der hant getân hæte . als hier vore stêt
- 0,122 geschriben . swelich man heizet eine vrouwen zuo Meinze . slahen . stôzen
. oder rœufen . der sal bezzern den vrevet . als er daz mit der
- 0,123 hant hæte getân . ist aber daz ein lîhte wîp und ein verlumundet boese
vrouwe . einen man mit boesen Worten unde werken
- 0,124 ane bringet . slehet . rœufet . er oder zûhtiget sie . oder er daz boese wîp .
dâr umbe . sint sie decheine bezzerunge schuldic . swelich man
- 0,125 zuo Meinze einen man . der zuo Meinze sitztet . und sich dâ inne generet
und geweret . leidiget oder letzet der sal bezzern nâch
- 0,126 sîner missetât . als hier vore geschriben stêt . swelich burger geleidiget
geroufet geslagen oder gewunt wirdet . daz sal er klagen
- 0,127 den meistern . daz iz den meistern vûre kome in dem mînde als er geleidiget
oder geletzet ist . tuot er des niht sô sal man ime niht
- 0,128 rehten . swâ zwêne burger zuo Meinze . krieg oder vêhede mit einander
hânt und sich niht wollent süenen lâzen . daz die burgermeister
- 0,129 maht haben sie zuo verrehene und zuo süenenne . und swelicher die suone
brichet und sie . beide . der oder die sulen ûzer Meinze
- 0,130 sîn alsô lange . biz sie die suone die die burgermeister hânt gemachet stæte
halten und vollenvûeren . daz alle unser burger
- 0,131 die der voregenanden bezzerunge zwâ solten tuon . und niht en tuont . und
dâr über in der stat belîbent und niht ûz varent . die sulen
- 0,132 die meister ane grîfen und in der stete sloz legen alsô lange . als der rât wile
. daz nieman zuo Meinze sal halten muntliute
- 0,133 die iemanne dienen . oder geben . iz sîn kristene oder juden . und ist iz daz
in die meister dâr umbe ane sprechent er sal sich des
- 0,134 entslahen mit sînem eide oder sal ûzer Meinze varn ein vierteil jâres . und
dâr nâch tuon und bezzeren als daz mîrteil des
- 0,135 râtes spricht . ist iemannes . vater oder muoter . swester oder bruoder .
niftel oder mac . der ûzer Meinze in bezzerunge
- 0,136 was gevarn . swærlîche bettesiech liget oder tût ist in Meinze . der selbe
mac wole in Meinze varen ahte tage sînen
- 0,137 vriunt zuo sehene . und sal daz mit der meister urloube geschehen . und
nâch den ahte tagen sal er wider ûz Meinze varen in
- 0,138 sîne bezzerunge . swelich vrouwe zuo Meinze wonende ist . die dâ leidiget
oder letzet . oder heizet iemannen leidigen oder letzen
- 0,139 iemannen zuo Meinze . der sich dâ inne generet unde gewert . an sîneme
lîbe . oder an sîneme guote iz sî vrouwe oder man . swanne

- 0,140 man ir des schult gât sie sal sich entschuldigen mit irem eide . daz sie daz
niht geheizen . gerâten . oder getân habe . und
- 0,141 ist daz sie niht en sweret sô sal sie inne ligen alsô lange in ireme hûse oder
ûze Meinze varn . ob sie wile . umbe ire missetât
- 0,142 als ein man . der ûz solte varn . nâch sîner missetât . als hier vore geschriben
stêt . und sal niht geltes geben .
- 0,143 ouch nemen ûz sunderlîche . daz wider unsem eide und unsem
gemechenisse niht en sî . daz hier vore geschriben ist
- 0,144 swaz wir mit den juden von Meinze tuon . schaffen . und übertragen .
swelich râthêrre der in der stat zuo Meinze ist . und
- 0,145 der iz mac getuon vore lîbes noeten . disen brief in disem mânde niht sweret
stæte zuo haltene . der sal in disem jâre niht
- 0,146 in den rât gên . swer die juden vrouwen oder manne . zuo Meinze leidiget
. oder letzet . an ireme lîbe oder an ireme guote . der
- 0,147 sal der voregenanden bezzerunge zwâ tuon . ouch ist iz daz ieman in der
stete bezzerunge swærlîche ûze Meinze wirdet
- 0,148 bettesiech der mac wole in Meinze varn in sîner siuchede und dâ inne
verlîben alsô lange . biz er gên und stên mac . und
- 0,149 dâr nâch sal er wider ûz varen in sîne bezzerunge . daz wir alse dise vorewort
zuo Vilzbach solen halten alse zuo
- 0,150 Meinze . wande Vilzbach liget zuo allen deme rehte alse Meinze . swer ûz
Meinze vert in der stete bezzerunge der mac
- 0,151 wole sîn swâ er wile . wen zuo Meinze und zuo Vilzbach . swem die meister
. oder der stete knehte vüre gebietent . und niht
- 0,152 vüre kumet den sal man pfenden . vüre einen schillinc kölnischer . und ist
daz er zuo dem anderen mâl . niht vüre kumet . und niht
- 0,153 ûz Meinze vert nâch der meister gebote . sô sal man in anderwerbe pfenden
. vüre einen schillinc kölnischer . und ist daz er zuo deme
- 0,154 dritten mâl niht vüre kumet als im die meister oder einer selbe gebiutet .
sô sulen in die burgermeister ane grîfen . und sulent
- 0,155 in in der stete sloz legen ahte tage . und ist daz er dâr nâch niht ûz vert . sô
sulen in die meister wider in daz sloz legen alsô
- 0,156 lange als daz mêrteil des râtes sprichet . daz nieman zuo Meinze sal rîten .
mit swerten . mit rûtingen oder mit stichmezzeren .
- 0,157 oder mit buckelæren oder mit anderm gewæfene . er wolle danne zuo velde
rîten . und swer daz brichet der sal bezzeren
- 0,158 alsô gienge er ûf der erden . iz en sî daz man steche . oder turnei habe ûf
dem hove . swer die predigær . Augustinere
- 0,159 barvuozen . wîze bruoder von Meinze . heimsuochet . leidiget oder letzet .
der sal bezzeren nâch sîner missetât als hier
- 0,160 vore geschriben stêt . swelich münich oder nunne . die gehôrsemede . irem
abbete . probeste oder eppetissinne hât getân
- 0,161 und ûz löufet und in die stat zuo Meinze gêt . ist daz der abbet . prîor .
probest oder eppetisse . und ire oberste meisterschaf .
- 0,162 sie wider in ire klôster eischent . die abetrünnige müniche oder nunnen .
die sulen wir wider antwürten ire obersten meisterschaf
- 0,163 ob sie daz vordernt . daz alle die zuo Meinze inne wonent . und sich dâ inne
nerent und gewernt . diz voregenande

- 0,164 gemechenisse stæte und veste halten . und swer daz brichet der sal den
vrevcl bezzeren als hier vore geschriben ist . daz
- 0,165 alle dise voregenanden vrevcl und bezzerunge . unser burgermeister einer
oder beide sulent vorderen tuon . und vüre sich
- 0,166 gebieten mit irem eide . als hier vore mit sunderlingen artikelen geschriben
ist . und bescheiden . und ist daz ieman dâr
- 0,167 wider ist und sich gein in setzet . dâr zuo sulen sie uns manen und ane
sprechen . und sulen wir in helfen nâch unser
- 0,168 maht mit allem vlîze . daz nieman zuo Meinze sal machen oder setzen daz
wider den râte sîn . oder wider des râtes
- 0,169 gemechenisse . swelicher leie daz sîn . und swer daz brichet er und sîne
mitevolgær . die sulen nâch der meister gebote . zuo bezzerunge
- 0,170 ûze Meinze varen zwei jâr . ist aber daz ieman iet guotes vindet daz der stat
und deme râte guot ist . oder weiz daz der stat
- 0,171 schadelich oder arclich ist . der sal iz den meistern . und deme râte sagen .
unde vüre bringen . daz wir der râte alle die
- 0,172 einunge die wir in dem râte machen sulen stæte halten . und swelicher
unser die brichet . der sal der einunge zwâ geben
- 0,173 daz wir alle dise artikele als die hier vore geschriben stênt und mit
offenlîchen Worten bescheiden sint sulen veste
- 0,174 unde stæte halten âne geværde und âne arge liste . und des helfe uns got .
âmen . ouch wart dirre brief geschriben
- 0,175 und gemachet . in des jâres vriste . als man zelet von gotes gebûrte . tûsent
jâr driu hundert jâr .
- 0,176 swelich man sîne burgerschaf ûf gît zuo Meinze . und ûf eines anderen
burgers guot klaget von Meinze . der sal
- 0,177 ûz Meinze ein jâr varen . und sal dâr zuo alsô lange . ûz Meinze sîn und
bezzerunge tuon . als daz mêrteil des
- 0,178 râtes sprichet . und sal von allerêrste von der klage lâzen . swelich man zuo
Meinze inne wonet . und der vore geschriben
- 0,179 vrevcl einen oder mêr tuot . oder kuntlîche wile tuon . und sich verbirget
als in die meister . oder einer suochet . der
- 0,180 meister . und sich niht wile lâzen vinden . in des vrevclæres hûs oder hov
dâ er inne wonet . sulent die meister
- 0,181 oder ein meister kuntlîche sagen . und gebieten den vriden . und brichet
er dâr nâch den vriden sô sal er bezzern den
- 0,182 vrevcl dâ nâch der vrevcl ist . gelîcherwîs als hæten die meister . oder ein
meister ime den vriden geboten
- 0,183 ist daz die stat offenlîchen und gemeinen krieg hât . daz alle unser burger
die in der stete bezzerunge . umbe vrevcl
- 0,184 ûz der stat sîn . âne aleine die tûtslac hânt getân . daz die wider in Meinze
varn . die wile daz alsolich krieg
- 0,185 weret . ob daz mêrteil des râtes des zuo râte wirdet . und swanne die
burgermeister sie heizent wider ûz varen . sô sulen sie in
- 0,186 ire bezzerunge wider ûz varen . und alsô lange ûze sîn als sie solten sîn
gewesen . daz dechein orden in Meinze .
- 0,187 sal unser stete vrîheit brechen . oder understên zuo brechene . und swelich
orden dâr wider tuot der sal in der stete vriden niht

- 0,188 sîn . swer vrevelt in decheinem münster . klôster . oder kirechen in Meinze
. daz der zwivaltige bezzerunge sal tuon
- 0,189 unde lîden . wær iz daz kein unser burger . einen unrehten krieg oder sache
hât gein iemanne . gæbe er den krieg
- 0,190 oder die sache ein ûzmanne . alsô daz der stat schade oder schade dannen
abe quæme des sal man warten ûf des lîp und
- 0,191 guot . daz nieman in dem râte sal nemen decheiner hande guot oder lêhen
von iemanne daz wider der stete vrîheit oder
- 0,192 êre sî . und swer daz brichet der sal niemer in den rât komen . swelich man
oder vrouwe erbe hât in Meinze . sie wonen
- 0,193 in Meinze oder niht vûre der erbe man gesteinert hât . und man noch steinen
sal . und sie den zwein den iz die stat bevollen
- 0,194 hât und noch bevillhet . des geltes niht en gebent . daz die mûgent pfant
vorderen an den . swes daz erbe ist oder
- 0,195 dâ inne wonet . und gebent die des geltes niht . in den ahte tagen . sô
sulent sie ûz Meinze varen einen mânt und alsô
- 0,196 lange ûze Meinze sîn . biz sie daz gelt gegeben ist ouch sache daz ieman
ûzer Meinze wonet . und erbe in Meinze
- 0,197 hât . und des geltes niht en gibet . sô sal der swer in dem erbe wonet . daz
gelt geben . und sal alsô lange in dem erbe
- 0,198 sitzen unde wonen biz er daz gelt an dem zinse versitzet . und sal in die stat
des weren . ist daz ieman in Meinze
- 0,199 mist . erden . steine . kersal . oder ander unvlæticheit in die gazzen . oder
vûre sîn selbes hûs oder hov tuot tragen oder
- 0,200 schütet . der sal iz alle wochen an dem sameztage ûzer Meinze schaffen
oder sal ein halp pfunt haller geben ist ouch
- 0,201 daz ieman bûwet und durch nôt holz oder steine . oder ander dinc daz dem
bûwe hoeret niht alsô zîtliche mac .
- 0,202 enwec geschaffen . des nôt solen die viere betrahten . die über den bûw
gesetzt sint . swelich [...] decheiner
- 0,203 leie [...] under einander [...] iemannes [...] anders hûs . hov oder garten
tuot tragen oder stoezet
- 0,204 oder unvlât tuot von schame oder schande . mac man in des bereden mit
eineme biderben manne oder vrouwen den sal man
- 0,205 pfenden vûre ein halp pfunt haller alsô dicke als er daz brichet . oder er sal
sich entslahen mit sînem eide . swelich jude eischet
- 0,206 kein unsen burger . wie zuo helfene zuo sîner sache zuo jüdischem rehte .
der jude sal geben vûnvzic pfunt haller . zuo bezzerunge
- 0,207 der stat . und jener den er dâr zuo eischet der sal ûz Meinze varen einen
mânt zuo bezzerunge swelich burger .
- 0,208 zuo Meinze . gesalzene . oder grüene vische . vrisch oder gesalzen durre
oder grüene kœufet umbe einen gast . der sal iz ime
- 0,209 gelten ûf die zît als er gelobet . oder man sal in dâ vûre pfenden . swâ man
in des mit guoter kuntschaf bereden mac .
- 0,210 swaz die meister . einer oder beide sprechent . swer sie des widertrîbet .
und daz widerredet er sî in dem râte oder ûzwentic
- 0,211 der sal ûze Meinze varn ein vierteil jâres . swer einen koufman slehet . oder
rœufet umbe daz sîne . der sal bezzeren

- 0,212 gelîcherwîs als er daz einem burger hæte getân . swelich man zuo Meinze
den andern ane grîfet âne gerehte und âne
0,213 klage . der sal varen ûzer Meinze ein vierteil jâres . ez en sî daz man ime
reht versage . swelich burger einen kumber
0,214 wile tuon . der sal in mit der meister urloube tuon . iz sî in Meinze oder
ûzwentic Meinze . und sal den kumber den burgermeistern
0,215 antwürten . ob sie den eischent . und swer des niht tuot der sal ûz Meinze
varen ein vierteil jâres und sal
0,216 dâr nâch tuon als daz mêrteil des râtes sprichet . daz nieman der zuo Meinze
wonet unser burger . er sî vrouwe
0,217 oder man . laden sal den anderen umbe keine scheltwort . kumet der klagær
vüre die burgermeister . unde klaget in . die
0,218 sulen in heizen . daz er dâ von lâze . unde tuot er des niht . sô sal er einen
mânt ûz Meinze varn . und sal doch dâ von
0,219 lâzen . swem die meister den vriden gebietent zuo haltene . brichet er den
mit den werken . sô sal er zwei jâr ûze
0,220 varn . brichet er in aber mit den Worten . sô sal er ûze Meinze varn ein halp
jâr . der man sal ûz varen .
0,221 die vrouwe sal inne ligen oder ûz varn .